



## HESCH AU ANGSCHT?

Nacht und Näbel hüllt aim y..  
me seet nit vyyl – spyyrts aber gly  
s muess ebbis Beeses umme sy....  
dunggli Wääse schliiche umme  
lääri Gsichter seet me numme  
s kennt sy kaine – das isch s Dumme  
was sy vorhänn, isch nyt rächts  
was sy wänn, isch ebbis Schlächts  
s dien zwai enander noocheplitze  
gly seet me au e Mässer blitze  
ain versuecht, dr ander z schlitze  
e Gegeweer duet gar nyt nitze  
e Schrei, e Schlag – und dä duet sitze  
s fällt ebber um mit vollem Gwicht  
griegt no am Boode - e Tritt ins Gsicht  
denn schnuoft er nimm – und im e Bricht  
stoot: „wer es war, das weiss man nicht...“  
Du mainsch jetz gly – die Szenerie  
die ka doch gar nit anders sy  
als ussere Crime- und Sex-Serie...  
aber d Wooret faart der yy  
und am beschte schiggsch dy dry  
vyllicht bisch jo ganz nooch derby  
denn es kennti durchuss sy  
und laider isch's kai Utopie  
by uns doo z'Basel an mym Rhy  
bassiert das au– daaguss – daagy !  
Es isch e Lische uusekoo  
die haili Wält isch nimme doo  
im Fuessball hänn sy's d Kroone gnoo  
derfyyr hett Basel noo di noo  
jetz ganz en andri yberkoo:  
mir bilde – kunnsch vor Angscht ins Schwitze  
schwyzwytt kriminell jetz d Spitze !  
Verbrächer, Droogehändlerhorde  
sinn z Basel lengscht zum Alltag worde  
Schleeger wo dien ummekiffe  
Söinigggel wo wild ummeschiffe  
Vandale wo kai Ornig hänn  
Und die Ornig au nit wänn  
das isch die kriminelli Bruet  
und die duet Basel gar nit guet  
fascht dääglic ka doo irgendwo  
ebber ebbis abbikoo  
zum Bischpill haig ain d Sau abloo  
aim sy Bortmonnee abgnoo  
und will dä sich's nit loot nää  
däm aifach ain uff d Schnuure gää  
Oder s kunnt e Macho z bloche  
isch ins Miliöö yynebrooche  
und hett aini zämmegstoche  
denn isch das scho raui Gwalt  
wie im alte London bald  
Tatort hänn mir am Färnsee kaine  
drfyr in Basel – mee als aine  
Dreiroosepark und Erlestrooss  
do isch d Tragik bsunders grooss  
aimool schloot ain, ganz ohni Not  
brutal en arme Deyfel z dood  
bym andre Mool do goots um Drooge  
gly hett ain e Waffe zooge  
zwai hänn miesse s Lääbe loo  
waisch nit wär, was und wieso  
s bassiert an jedem Egge bald  
unhaimlig wird's by uns und kalt  
In unsrem Zug wämmir Eych zaige  
mir sinn e kriminelle Raige  
schliiche à la Jack the Ripper  
verbraite wie-nen-Art e Tripper  
däm sy Gaischt in unsri Gasse  
wo langsam alli Menscherasse  
wie ne anonymi Masse  
will sy nimme zämmebasse  
immer mee enander hasse  
Wottsch am e Tatort Lämpe haa  
denn lueg der s mindri Basel aa  
färn vo Ordng und vo Zucht  
findsch im Zäntrum vo dr Sucht  
Nuttebahnhof – Schweinebucht  
dert mische sich mit voller Wucht  
die importierte Horizontale  
hinderem Strich, däm ganz Legale  
unter die Normal-Lokale  
und was denn kunnt, isch s Assoziale  
Die Wybli dien sich nit verdraage  
me goot sich radikal an Graage  
und im Gedränge ka's denn gschee  
aini - hesch sy grad no gsee  
isch jetz bletzlig niene mee !  
Claramatte, Wäbergass, Rappoltshof  
wär dert woont, kunnt um e Schloof  
Immer greesser wird dr Verbrächersumpf  
Kunnsch au scho am hälliechte Daag – uf e Rumpf  
am en ander Tatort isch d Angscht au gross  
im Santihans, an dr Wasserstrooss  
hetts e Bandi, die goot uf d Schugger loos  
fyr die duet sich s Aanegoo nimm loone  
drum nennt me das aifach – e rächtsfreyi Zoone  
Aber wenn denn so Schugger – statt d Ordng z hiete  
ihri Hilf gege d'Aenggel-Betrieger aabiete  
zum noohär uff aigeni Rächng z'wiete  
no mien der Eych hiete, sone Schugger go miete  
Angscht ? Hesch rächt, die ka me haa  
nur luege mir's no anderscht aa  
stell der vor, s wurd nyt bassiere  
jä, wie kennte denn d'Medie existiere ?  
fyr die isch jedi Tat e Kniller  
e Lugge- und e Kassefiller  
us Bagatelle wird yber Nacht  
ohni z briefe grad eTatort gmacht  
und ellai wills in dr Zyttig duet stoo  
wird's als bewieseni Tatsach gno  
und die erschti Angscht – isch au scho do...  
Mir pfyffe z'Basel vor Angscht scho im Wald  
nur wenn dr Baschi druff aasprichsch, sait dä ganz kalt:  
in sältene Fäll gäbs vyllicht e bitz Gwalt  
aber das syg hittzuedaag – s'glyych Risiko halt  
wie die äxtra hooche Trottoir wo me dryberfallt...  
das gitt däm nyt z schaffe – grad wie dääne drei Affe:  
Nyt gsee, nyt gheere, nyt welle wisse  
statt dy sicher z fyyle – fyhlsch dy bschisse..  
Hesch au Angscht – waisch au nit wytter ?  
seesch immer alles schwarz und schitter  
und seets mänggmool – s'isch jo woor  
krimineller als friehner uss duur s'Joor  
no kemme doch no Momäntli vor  
do bassiert au e Huffe zwoor  
s'hett au e Puff – und Drägg liggt umme  
und d Lyt dien au bleed – und sich verumme  
und schiesse au mänggmool uss jedem Roor  
no muesch kai Schiss haa – s isch kai Gfoor  
denn isch's nämmlig Fasnacht in unsre Gasse  
zum Spasse sinn alli wieder ai Rasse  
wär nit guet duet, duet me schasse  
Drum isch's drey Dääg lang nit vermässe  
wenn d'sunscht au Angscht hesch – die z vergässe !!

